



Forma Foun Operasaun Krime Organizadu iha Timor-Leste

Mahein Nia Lian Nú. 60, 03 Outobru 2013



Suporta Husi Povu Amerikanu liu husi USAID, Embaxada Finlandia iha Jakarta no Relatoriu Ida ne'e Suporta Atividade Departamentu Harii Paz no Koezaun Sosial ho Suporta Orsamentu husi UNDP-Timor-Leste



Website: www.fundasaunmahein.org

Introdusaun

Krime organizadu hanesan atividade ilegal ne'ebé involve individu ka grupu ne'ebé iha kapital, involve iha komersiu ilegal kompostu husi trafiku umanu, trafiku droga, fase osan (*money laundering*), terorista, no grupu ilegal profesional ne'ebé organizadu, na'ok motor, asaltu no hadau, violasaun seksual, grupu gen sira halo perturbasaun ba ordem públika nian no oho malu.¹

Relatoriu dahuluk ne'ebé Fundasaun Mahein (FM) públika iha tinan 2010 identifika grupu krime organizadu sira ne'ebé halo operasaun iha Timor-Leste maka prostituisaun, trafiku droga, naok motor no fase osan (*money laundering*). Iha relatoriu ne'e FM rekomenda tiha ona katak tenki fortifika kontrolu husi autoridade siguransa hodi prevene operasaun krime organizadu ne'ebé nia rede komesa kesi ona iha sosiedade nia leet.²

Iha Agustu 2013 FM alerta segundu kona-bá operasaun krime organizadu iha Timor-Leste. Grupu krime organizadu hahu rekruta ema ho número boot no involve joven sira. Objetivu krime organizadu iha Timor-Leste ne'e atu hadau osan ka asaltu ema nia sasan, violasaun seksual no tendensia seluk halai ba omesidu ka oho. Violasaun seksual hasoru feto ida iha Embasada Amerika nia oin nune'e mos hasoru feto ho mane ida iha Tasi Tolu hodi obriga sira halo relasaun seksual depois halo filmajem ne'ebé dadaun ne'e akontese. Volume violensia mosu bebeik involve Timor oan sira sai autor nune'e mos sai mos vitima.³

Relatoriu simples ida la iha atensaun husi autoridade siguransa. Liu deit semana hirak nia laran mosu insidenti ida grave tebes iha kapital Dili, halo comunidade pániku no tauk la'o sai iha tempu kalan. Kazu 24 Setembru 2013 justifika situasaun ida ne'e ne'ebé rezulta joven ida mate iha Marconi no hakanek na'in rua seluk iha Kampung Alor no Fatuhada nu'udar asaun husi grupu organizadu sira.

Metodolojia ne'ebé adopta iha peskiza ne'e hodi rekolla informasaun sira kona-bá operasaun krime organizadu iha Timor-Leste. Liu husi diskusaun iha ekipa peskiza FM nian ho modelu *Security Sector Discussion* (SSD), entrevista ho fontes FM nian, observasaun ba violensia sira ne'ebé akontese, inklui rekolla informasaun sira husi publikasaun media nasional. Pontu análise husi relatoriu ne'e maka operasaun grupu krime organizadu ho forma operasaun oho ema iha kapital Dili, asaltu sira iha kapital Dili ho forma hadau ka kobransa ilegal no violensia seksual, ikus liu publikasaun filmajem no fotografia sira nia tendensia halai ba pornografia.

¹ Fundasaun Mahein – FM (2010). Mahein Nia Lian No. 14 Operasi Kejahatan Terorganisir di Timor-Leste. Dili

² Fundasaun Mahein – FM (2010). Mahein Nia Lian No. 14 Operasi Kejahatan Terorganisir di Timor-Leste. Dili

³ Fundasaun Mahein (2013). Krime Organizadu: Rekrutamentu Ba Ema Sivil Ho Numeiru Boot. Dili <http://www.fundasaunmahein.org/2013/08/15/organized-crime-increases-civilian-recruitment/>


Operasaun Grupu Krime Organizadu

FM nian monitorizasaun krime organizadu nia operasaun ho tipu foun ne'ebé kontinua rekruta Timor oan ne'ebé partisipa iha atividade ilegal dadaun ne'e maka'as tebes. Sidadaun Timor-Leste ne'ebé mai husi *back ground* oin-oin rekruta sai membru krime organizadu iha biban ne'ebé inflasaun ekonomia halo sira moris kiak. Grupu comunidade sira ne'ebé krime organizadu konsege rekruta maka sira balu iha institusaun Governu nia laran, taksista sira, membru geng, autoridade guarda fronteira sira balu, nune'e mos individu balu iha aero portu ka portu sira iha Timor-Leste.⁴

Inflasaun ekonomia hamoris tan dezempregu ne'ebé boot, nune'e mos vensementu kiik ba funsionariu públiku sira, menus kontrolu ba atividades ilegal, nune'e fo biban barak ba malisan atu partisipa iha krime organizadu hetok boot liu hodi atraku Timor oan barak ne'ebé laiha biban atu ses an.

Insentiva saida maka bele uza atu Timor oan sira buka moris ho onestu, wainhira krime organizadu rekruta sira atu partisipa iha atividade krime organizadu ne'ebé hetan lukru diak liu? Karik Governu la dezenvolve kona-bá lalaok prevensaun no kombate kauza Timor oan sira nia involmentu ba atividade krime organizadu maka problema sei lahotu hela deit.⁵

Rede Operasaun Krime Organizadu



Fontes: Rezultadu Peskiza FM (2013)⁶

Husi grafika iha leten atu esplika maka tuir mai ne'e: grupu intelektual nu'udar grupu ida ne'ebé bele halo análiza ba situasaun sosial, ekonomiku, polítika, lei no siguransa nian iha ne'ebé situasaun saida maka sira bele infiltra no fornese rezultadu analiza hirak ne'e ba grupu lider

⁴ Fundasaun Mahein (2013). Krime Organizadu: Rekrutamentu Ba Ema Sivil Ho Numeiru Boot. Dili <http://www.fundasaunmahein.org/2013/08/15/organized-crime-increases-civilian-recruitment/>

⁵ Fundasaun Mahein (2013). Krime Organizadu: Rekrutamentu Ba Ema Sivil Ho Numeiru Boot. Dili <http://www.fundasaunmahein.org/2013/08/15/organized-crime-increases-civilian-recruitment/>

⁶ Grafika rede grupu krime organizadu nu'udar rezultadu husi peskiza Fundasaun Mahein (FM). Dili, 01 Outobru 2013.

ezekutivu no grupu seluk simu delega operasaun no ezekuta husi ekipa ezeutador no nia rede sira.

Rezultadu peskiza ne'ebé FM hetan hatudu katak *premeiru grupu intelektual* nia papel nu'udar grupu ne'ebé bele halo análiza ba situasaun sosial, ekonomiku, política, lei no seguransa nasional. Inklui sai hanesan doador ka finansia atividade krime organizadu nian no sai hanesan sentru análiza no forneselementu informasaun ba lider ezeutivu. Timor-Leste iha situasaun ida ne'ebé número kiak no dezempregu aumenta no inflasaun ekonomia sa'e maka'as iha momentu ne'ebé rendimentu Fundu Petroleu sa'e maka'as hodi sustenta Orsamentu Jeral Estadu (OJE) ne'ebé boot mos. Ironiku liu tan OJE ne'ebé boot maibe la iha disiplinatu atu gasta no osan sulin maka'as tebes, ida ne'e atraku tebes krime organizadu no reforsa nia rede iha Timor-Leste hodi organiza krime. Iha ambitu seluk, kontrolu siguransa ne'ebé minimu tebes husi autoridade siguransa hanesan espasu ba krime organiza infiltra iha Timor-Leste iha momentu ida ne'ebé lei la'os komandante.

Segundu lider ezeutivu ekipa ida ne'ebé ezeutiva análiza sira husi grupu intelektual nian hodi dezeña planu asaun ba operasaun krime organizadu nian. Mobiliza lojistika no orsamentu hodi finansia atividade krime organizadu. Lider ezeutivu mobiliza mos oinsa bele hetan osan hodi sustenta krime organizadu liu husi atividade ilegal sira hanesan trafiku droga, komersiu ilegal sira hanesan na'ok motor no fa'an fila fali, no rekruta feto sira husi rai liur no involve iha prostitusaun. Hodi hetan lukru husi atividade hirak ne'e no finansia krime organizadu.

Terseiru grupu delegasaun operasaun nu'udar delegasaun ida ne'ebé atu operasionaliza planu asaun ne'ebé prepara husi lider ezeutivu no simu orientasaun ba operasaun nian. Grupulu ida ne'e halo mos identifikaun ba fatin operasaun nian, identifika tarjetu operasaun, identifika ema atu rekruta no determina tempu ba operasaun nian.

Kuartu ekipa ezeutador nu'udar grupulu ne'ebé lansa asaun krime organizadu nian iha kampu ho nia forma hanesan oho ema, sona ema, asaltu, hadau sasan, teror, violasaun seksual, na'ok no manipulasaun informasaun. Ezemplu, rumoris ne'ebé espalla iha kalan 27 Setembru 2013 insidenti ida iha Comoro sona "madre" ida iha Timor Plaza nia oin nu'udar modelu manipulasaun informasaun husi grupulu krime organizadu sira hafoin akonteselementu 24 Setembru 2013. KIBATA, MONSTER, DEWA MABUK no MAGER (*Manusia Geger*) nu'udar forma ida husi ekipa ezeutador krime organizadu nian ne'ebé lansa asaun oho ema, trafiku ba droga, violasaun seksual, na'ok no seluk tan iha kapital Dili.

Husi dezeñu rede operasaun iha leten konklui katak grupulu organizadu sira ne'ebé identifika husi grupulu intelektual, lider ezeutivu, delegasaun operasaun no ekipa ezeutador, simu orientasaun husi grupulu ida ba grupulu seluk ho forma orientasaun sekretu. Kada grupulu implementa deit orientasaun serbisu husi grupulu seluk maibe sira rasik ladetekta malu orientasaun hun lolos mai husi ne'ebé. Ho ida ne'e difisil mos ba autoridade siguransa atu detekta rede krime organizadu hirak ne'e iha serbisu investigasaun nian.

Observasaun FM nian deskonfia sei iha tan grupulu seluk hanesan KIBATA no grupulu seluk movimentu iha kapital Dili. FM husu ba autoridade polisial tenki halo investigasaun ida ne'ebé

profundu hodi identifika kle'an liu tan grupu seluk nia ezistensia no autor prinsipal husi grupu organizadu ne'ebé eziste.

1. *Operasaun Grupu KIBATA no MONSTER⁷ iha 24 Setembru 2013*

Mosu insidenti ida ne'ebé grave tebes iha loron 24 Setembru 2013 ne'ebé sei manas hela iha comunidade nia kakutak no sai diskusaun públiku iha sosiedade nia leet no aktu ne'ebé traumatiku tebe-tebes. Autor na'in rua ho motor ida iha minutu balu nia laran, sona joven ida mate iha Marconi no hakanek na'in rua iha area Kampung Alor no Fatuhada.⁸

Informasaun ne'ebé FM asesu kronolojia antes akontesementu, suspeitu ho nia kolega sira hemu tua iha "J" nia uma Lurumata - Comoro. Suspeitu nia kolega ho inisial "O" maka sosa tua, informasaun ne'ebé FM asesu deskonfia "J" kahur droga ho tua no fuma mos *ganja*. Depois ida ne'e suspeitu ho nia kolega sira sadik malu atu ba oho ema. Nune'e suspeitu ho nia kolega ida ho motor sai ho sona kanek no tá mate vitima balu iha parte Kampung Alor, Marconi no Fatuhada.

"J" deskonfia nu'udar bandar droga ida iha kapital Dili ne'ebé iha relasaun ho grupu bandar droga Indonezia nian. Fontes ne'ebé FM asesu katak "J" sai hela deit ba Indonezia no "J" nia fen ema Indonezia maibe "J" sai bebeik la iha objetivu ne'ebé klaru. Konfirma mos katak "J" nu'udar distributor ropa obralan iha kapital Dili. Familia ida husi suspeitu nian esplika katak suspeitu durante hanesan ema tauk ida no iha uma deit derepent deit oho ema no sona kanek ema barak, familia suspeitu deskonfia antes suspeitu oho ema, dalaruma sira hemu tua kahur ho droga.⁹

Hafoin kapturasaun suspeitu na'in rua, investigasaun PNTL deskonfia suspeitu na'in rua hemu uluk droga depois kontinua oho ema. Komadante Operasaun PNTL Superintendenti Xefe Armando Monteiro hato'o iha media nasional katak polisia investigasaun sei halo teste *urine* hodi konfirma suspeitu konsumu duni droga ka lae?¹⁰

Monteiro mos konfirma, PNTL identifika ona grupu sira ne'ebé maka durante ne'e tenta mobiliza ema hodi halo krime iha kapital Dili iha tempu loron no kalan hodi estraga estabilidade. Lokalidade grupu sira ne'e iha kapital Dili. Deskonfia suspeitu na'in rua involve iha grupu KIBATA no MONSTER ne'ebé oho ema iha Marconi no hakanek na'in rua seluk iha Kampung Alor no Fatuhada.¹¹

PNTL identifika mos grupu KIBATA no MONSTER nia membru hamutuk 200 pesoas espalla iha Dili laran.¹² Maske grupu rua ne'e sai hanesan tarjetu operasaun PNTL nian no tau hanesan

⁷ MONSTER – *Moris Tenki Hasoru Terus*. KIBATA – *Kipas Dulu Baru Tanya*.

⁸ Suara Timor Lorosa'e (STL) – Online (2013). Kazu Marconi, Hamate Joven 1 No Hakanek nain 2. <http://suara-timor-lorosae.com/kazu-marconi-hamate-joven-1-no-hakanek-nain-2/>. Asesu iha loron 30 Setembru 2013

⁹ A. C (2013, 26 Setembru). Entrevista Pesoal

¹⁰ Jornal Diario Nasional. Segunda, 30 Setembru 2013.

¹¹ Jornal Diario Nasional. Segunda, 30 Setembru 2013.

¹² Jornal Timor Post. Segunda, 30 Setembru 2013

prioridade no bele hola medida prevensaun. Maibe medida prevensaun saida maka ita prezisa hodi halo intervensaun ba situasaun ida ne'e?

Membru balu husi grupu KIBATA no MONSTER iha ona investigasaun PNTL nian no identifika rede husi grupu ne'e rasik. Investigasaun ida tenki profundu hodi identifika lolos grupu rua ne'e nia ezistensia, portantu nia forma organizadu no asaun planeadu. Se mak organiza? Se mak fasilita? No se mak iha grupu ne'e nia kotuk?

2. *Asaltu no ameasa iha fatin públiku sira (kobransa ilegal no violasaun seksual)*

iha tinan 2010 to'o 2013 iha forma foun operasaun husi grupu organizadu sira iha kapital Dili. Aktu husi grupu organizadu ne'e ho nia forma asaltu hasoru joven sira ne'ebé tur ho nia namorada no namoradu iha fatin públiku no obriga sira pratika buat ne'ebé la ho sira nia konsensia no vontade rasik.

iha tinan 2010 nia rohan espalla fotografia balu ne'ebé iha fotografia ne'e rasik hatudu iha grupu balu kompleta ho katana ameasa no kaer joven sira ne'ebé tur ho nia namorada ka namorada iha area Kristo Rei nian no Dolok Oan.¹³

Tinan 2012 akontese mos kazu ida iha parte Kristu Rei – Dili nian husi siguransa sivil ne'ebé fo siguransa iha area Kristu Rei nian tenta asaltu joven ida ho nia namorada tur iha fatin paseu nian maibe lakonsege kaer. Joven ne'e informa katak sira sente la seguru wainhira tur iha fatin públiku ho nia namorada ka nomoradu inklui kolega tanba iha deskonfiasa no presepsaun negativu husi ema seluk wainhira fetu no mane tur hamutuk iha fatin ida.¹⁴

Akontesementu seluk iha jardim Largo Lecidere iha Maiu 2013 wainhira joven ida ho nia namorada tur iha area jardim nian iha tempu kalan, grupu siguransa ne'ebé fo siguransa iha area refere tenta asaltu ho nia forma ameasa no duni sai husi fatin refere.¹⁵

Iha fulan Juñu 2013 grupu deskuiñesidu ida hamutuk ema na'in tolu derepentini asaltu no ameasa joven ida ho nia namorada tur iha jardim Motael (Igreija Motael nia oin) mais-menus tuku hitu kalan. Grupu ne'e ameasa hodi polisia nia naran no tenta husu osan.¹⁶

Nune'e mos iha loron 24 Juñu 2013 media nasional fo sai katak joven fetu ida ho nia namorada tur iha tasi ibun Embaxada Amerika nian oin (Pantai Kelapa), grupu ida hamutuk ema na'in hat iha taxi laran tun ameasa nia namorada halai tiha. Grupu ne'e kaer joven fetu ne'e hatama ba taxi laran lori halai no halo relasaun seksual.¹⁷

Kazu hanesan relatoriu media nasional sira públika iha fulan Agustu 2013, grupu bandidu obriga fetu ida ho nia namorada halo relasaun seksual no hasai video, wainhira tur hamutuk iha

¹³ A. C (2010). Dokumentu A. C. Dili

¹⁴ M. L (2013). Entrevista Pesoal. Dili

¹⁵ B. J (2013). Entrevista Pesoal. Dili

¹⁶ P. Z (2013). Entrevista Pesoal. Dili

¹⁷ Timor Post. Kuarta, 04 Setembru 2013

area João Paulo, Tasi-Tolu nian.¹⁸ Komadante Servisu Investigasaun Kriminal Nasional konfirma katak kazu ne'e nia forma obriga ema halo video porno.¹⁹

FM nia observasaun ba kazu sira ne'ebé akontese, grupu ne'e nia forma organizadu, ameasa ekipadu ho sasan kroat ne'ebé nia tendensia halai ba kobransa ilegal no hadau sasan, seluk maka violensia seksual. Forma hirak ne'e akontese la'os mosu leet deit maibe iha kauza sosial no ekonomia ida maka obriga, portantu finalidade husi aktus ne'ebé akontese maka kobransa (osan), hadau sasan no forma seluk ne'ebé bele benefisia sira ekonomikamente no violasaun seksual.

3. Públिकासun filmajen no fotografia ne'ebé nia tendensia halai ba pornografia

Iha tinan klaran 2013 sai preokupasaun husi entidade tomak iha Timor-Leste kona-bá publikasaun filmajem no fotografia ne'ebé nia tendensia pornografia husi individu no karik husi grupu balu ne'ebé la iha responsabilidade iha media sosial hanesan facebook no portal anonimu balu.

Sai diskusaun públiku iha sosiedade Timor-Leste no iha media sosial hanesan facebook kestiona kona-bá públikasaun hirak ne'e. Pesoal balu ne'ebé utiliza facebook ho identidade falsu públika video no fotografia iha grupu facebook sira. Maske hetan reazen maka'as husi entidade tomak maibe iha media sosial sira kontinua públika video no fotografia ne'ebé ninia tendensia pornografia.

Preokupasaun husi Deputadu Bankada Parlamentar sira iha kestiona kona-bá video no fotografia ne'ebé ninia tendensia halai ba pornografia. Opiniaun públiku hatete presiza lei pornografia nian atu regulariza aktu hirak ne'e tanba ninia konsekuensia implika ba sosiedade Timor-Leste ne'ebé halai ba violensia seksual.²⁰

Iha tinan 2010 nia rohan espalla iha sosiedade nia leet no media sosial sira fo sai fotografia balu ne'ebé hasai husi grupu organizadu ne'ebé asaltu joven sira wainhira tur hamutuk namora malu iha area Kristo Rei – Dili nian. Fotografia ne'ebé espalla hatudu katak grupu organizadu ho nia forma balu lori katana ameasa joven sira, ameasa hadau motorizada ne'ebé vitima uza, iha mos osan balu ne'ebé vitima entrega ba grupu ne'e inklui hasai fotografia hodi espalla iha comunidade.²¹ Iha tinan hanesan espalla mos fotografia balu ho grupu ne'ebé hanesan ameasa joven feto ida ho nia namoradu iha tasi ibun Dolok-Oan nian. Iha fotografia ne'e hatudu ema ida husi grupu ne'e rasta joven feto ne'e no ameasa ho katana hatudu ba nia namoradu.²²

¹⁸ Timor Post. Tersa, 06 Agustu 2013.

¹⁹ Suara Timor Lorosa'e – STL. Tersa, 06 Agustu 2013

²⁰ Timor Post. (2013). Atividade prostituisaun buras, lei pornografia seidak sai preoridade. Dili

²¹ Fundasaun Mahein (FM) nia monitorizasaun ba forma sira ne'ebé akontese iha comunidade no iha media sosial hanesan facebook ne'ebé públika husi pesoal balu ho identidade falsu husi tinan 2010 to'o 2013. Dili

²² Fundasaun Mahein (FM) nia monitorizasaun ba forma sira ne'ebé akontese iha comunidade no iha media sosial hanesan facebook ne'ebé públika husi pesoal balu ho identidade falsu husi tinan 2010 to'o 2013. Dili

Iha tinan 2011 nia klaran espalla mos video balu ne'ebé nia tendensia halai ba pornografia iha sociedade nia leet. Iha video balu nia karakteristika privadu maibe ema ka grupu balu tenta espalla ba públiku iha media sosial ne'ebé la iha ema ruma maka responsavel ba pratika ida ne'e. Video seluk nia forma iha intensaun atu halo video pornografia ne'ebé hatudu iha video ne'e rasik katak iha ema seluk hasai hela fotografia no video husi autor rua ne'ebé halo relasaun seksual.²³

Iha kazu seluk ne'ebé deskonfia husi elementu PNTL involve halo video porno iha tinan 2011, espalla iha públiku no media sosial sira hanesan facebook no portal anonimu balu. Kazu ida ne'e sai preokupasaun husi entidade tomak iha Timor-Leste no la iha ema ruma maka responsavel ba públikasaun refere.²⁴ Maske iha altura ne'eba hetan reazen maka'as husi sociedade tomak tantu husi lider politiku, Igreija no comunidade sira.

Iha tinan 2012 espalla mos filmajem balu ne'ebé involve estudante na'in rua sai hanesan autor ba filmajem ne'e. Iha filmajem ne'e hatudu autor rasik maka hasai filmajem maibe ikus monu tiha ba ema seluk nia liman espalla iha comunidade no media sosial sira.²⁵

To'o tinan 2013 tuir FM nian monitorizasaun hare katak espalla mos filmajem ne'ebé suspeitu na'in lima ne'ebé obriga joven ida ho nia nomorada halo video porno iha area João Paulo Tasi-Tolu nian espalla iha media sosial hanesan facebook.²⁶

Fraku iha Kontrolu no Regulamentu

1. Operasaun autoridade siguransa

Buat ida ne'ebé FM hetan iha nia monitorizasaun konklui katak Komandu PNTL falla tiha ona iha planu operasaun nian. Portantu intervensaun ne'ebe akontese hafoin violencia. Maske alerta maka'as husi Komandu Jeral PNTL hasoru situasaun sira ne'e. Ida ne'e hatudu situasaun paniku ba comunidade no hatudu frakeza kapasidade instituisaun hasoru situasaun grave ruma.

Antes to'o tinan klaran 2013 husi lider politiku sira, Komandu Jeral PNTL, F-FDTL no comunidade tomak preokupa kona-bá ezistencia grupu arte marsial ne'ebé sempre provoca konflitu no violencia iha teritoriu Timor-Leste tomak. Iha tinan 2011 Governu Timor-Leste liu husi Konsellu Ministru hasai rezolusaun ida hodi suspende atividade arte marsial maibe violencia kontinua akontese, oho malu iha rai laran lori to'o rai liur.

Provokasaun no situasaun konflitu sempre identifika ho grupu arte marsial, grupu joven sira halo violencia iha bairu comunidade, utiliza atributu arte marsial sira. To'o tinan klaran 2013 Konsellu Ministru hasai tan rezolusaun ida hodi taka atividade arte marsial iha teritoriu tomak.

²³ Fundasaun Mahein (FM) nia monitorizasaun iha media sosial sira no preokupasaun sira iha comunidade nia leet kona-bá video ne'ebé espalla iha tinan 2011. Dili

²⁴ Timor Post. Kinta, 21 Marsu 2011.

²⁵ Fundasaun Mahein (FM) nia monitorizasaun iha media sosial sira no preokupasaun sira iha comunidade nia leet kona-bá video ne'ebé espalla iha tinan 2012. Dili

²⁶ Fundasaun Mahein (FM) nia monitorizasaun iha media sosial sira no preokupasaun sira iha comunidade nia leet kona-bá video ne'ebé espalla iha tinan 2013. Dili

Ezekusaun husi rezolusaun ida ne'e Komandu PNTL realiza operasaun ida boot tebes iha teritoriu Timor-Leste nian. Polisia sai uma tama uma, iha bairu no suku sosializa rezolusaun ida ne'e ba comunidade sira ne'ebé invove iha arte marsial hodi koopera ho autoridade polisia entrega atribut arte marsial nian.

Maske atividade grupu arte marsial taka ona maibe konflitu no violencia kontinua akontese signifika solusaun sira ne'ebé iha la refleta ba situasaun siguransa nian. Grupu joven sira ne'ebé antes ne'e fahe ba grupu oin-oin, krime organizadu rekruta fila fali sira hodi invove iha violencia. Ida ne'e hatudu iha kauza fundamental ida ne'ebé sei hakesi hela iha violencia ne'ebé la iha rohan.

Tinan klaran 2013 grupu organizadu lansa forma seluk iha comunidade liu husi operasaun iha fatin públiku sira hanesan tasiibun no jardim sira. Ezemplu, kazu traumatiku ida ne'ebé akontese iha area João Paulo Tasi-Tolu nian, iha grupu balu asaltu joven ida ho nia namorada no obriga sira halo relasaun seksual no grupu ne'e hasai filmajem no fotografia, ikus públika iha media sosial sira.²⁷ Iha tinan ne'ebé hanesan ho forma ne'ebé hanesan kaer joven feto ida hatama iha taxi laran halo relasaun seksual wainhira vitima ho nia namoradu tur iha tasiibun Pantai Kelapa – Dili nian.²⁸ Iha insidenti ne'e operasaun PNTL la'o maka'as tebes maibe la kleur deit.

Liu deit semana hirak nia laran mosu insidenti ida grave tebes iha kapital Dili, halo comunidade pániku. Kauza husi insidenti ne'e grupu joven ida hemu tua hamutuk ho droga iha bairu Lurumata – Dili, organizadamente lasu ho droga husi pesoal seluk iha grupu ne'e no fasilita ho motor hodi sadik malu ba oho ema²⁹ ne'ebé akontese iha loron 24 Setembre 2013 lansa husi Kampung Alor, Marconi to'o Fatuhada rezulta tá joven ida mate no na'in rua seluk kanek todan.³⁰

Observasaun FM nian ba operasaun PNTL iha terenu hafoin insidenti ne'e PNTL operasaun ne'ebé rigoroju iha estrada públiku sira kapital Dili nian ho postura volume operasaun PNTL nian boot tebes. Polisia halo operasaun maka'as hela iha kapital Dili, mosu boatus balu ne'ebé espalla halo comunidade pániku. Rumoris ne'ebé espalla iha kalan 27 Setembre 2013 maka insidenti ida iha Comoro sona "madre" ida iha Timor Plaza nia oin.³¹ Ida ne'e hatudu instituisaun siguransa la iha ona kapasidade atu kontrola ordem públika nian no fo espasu ba ema ne'ebé espalla informasaun falsu hodi hatauk comunidade. Lolos autoridade siguransa mantein komunikasaun ida efetivu ba comunidade no informa situasaun siguransa ne'ebé kredivel. Maibe buat hirak ne'e hotu falla no ema iresponsabilidade sira maka kontrola fali informasaun siguransa hodi espalla informasaun falsu iha comunidade.

Iha ambitu seluk, funksionamentu liña emergjensia 112 la funsiona normal no utiliza sala husi comunidade no fontes informasaun balu ne'ebé FM asesu husi pesoal PNTL sira katak dalaruma elementu PNTL balu utiliza lina ida ne'e hodi kontaktu nia kolega no familia. Ikus buat

²⁷ Timor Post. Tersa, 06 Agustu 2013

²⁸ Timor Post. Kuarta, 04 Setembre 2013

²⁹ A. C (2013). Entrevista Pesoal. Dili

³⁰ Timor Post. Kuarta, 25 Setembre 2013

³¹ Observasaun Fundasaun Mahein (FM). Sesta, 27 Setembre 2013

ne'ebé akontese atuasaun PNTL sempre tarde tanba liña emerjensia okupadu no lakon kontaktu husi comunidade ba polisia.

Iha kazu sira ne'ebé akontese liu dadauk, sociedade tomak hatudu ba PNTL tanba la iha operasaun ba prevensaun violensia nian no operasaun sira ne'ebé durante ne'e akontese hanesan buat hakfodak ida. Maibe presiza Estadu nia suporta ba PNTL, FM nia observasaun hatudu PNTL serbisu iha limitasaun nia laran maibe ita hotu obriga polisia tenki serbisu ho profesional. Iha inisiativa Komandu PNTL no distrital sira hanesan implementa polisia komunitaria liu husi hari'i Konsellu Polisiamentu Komunitaria (KPK) no Siguransa Voluntariu (SV) iha distritu sira ne'ebé involve lider komunitaria sira, joven feto no mane no lia na'in sira hanesan forsa siguransa ida ba prevensaun konfliktu nian. Maibe la iha suporta política no orsamentu husi Governu ba inisiativa hirak ne'e.

Asuntu seluk observasaun husi Diariu Timor Post hare katak operasaun husi serbisu intelejensia nian minimu tebes. Refere ba kazu 24 Setembru 2013 ne'ebé hamate joven ida no na'in rua kanek, deskreve *"Intelejen halo kna'ar masimu karik la presiza ema tenki mate maka kaptura suspeitu, kapturasaun halo tiha ona desde suspeitu sira halo planu atu oho ema, Dili kapital Nasaun ne'ebé ki'ik, tuir lolos kriminozu sira nia fatin fasil detekta. Nune'e mos intelejensia sira hatudu an malorek"*.³²

FM nia observasaun ba serbisu intelejensia durante ne'e kolekta deit dadus no informasaun, la iha análise dadus iha ekipa intelejensia nian hodi produs informasaun ida ne'ebé kredivel nune'e bele fo instrusaun ba polisia hodi halo operasaun. Iha kazu ne'ebé akontese dalabalu polisia rona deit informasaun sira ne'ebé espalla hodi halo operasaun. Ikus lahetan faktu ne'ebé husi informasaun ne'ebé espalla. Buat hirak ne'e hotu implika akontesementu ne'ebé iha hotu-hotu mobiliza ho operasaun maibe la prevene violensia, número vitima kontinua aumenta.

Ida ne'e hatudu presiza reforsa liu tan serbisu intelejensia, fortifika iha nivel koordinasaun nian entre Servisu Nasional Intelejensia (SNI), Intelejensia Polisia no Intelejensia Militar nian. FM nia observasaun hare katak iha pesoal balu husi intelejensia dalabalu hatudu nia an iha comunidade no públiku serbisu nu'udar intelejensia. Ida ne'e hatudu frakeza ida ne'ebé kriminozu sira bele ses an husi operasaun intelejensia nian no fasil tebes grupu krime organizadu sira bele halo kontra-intelejensia.

Sai hanesan pergunta, iha rekursu ne'ebé suporta intelejensia nia atividade ka lae, tantu husi rekursu umanu, fasilidade no finanseira?

2. Seidauk iha lei hodi regulariza públikasaun no serkulasaun hanesan pornografia

Sai preokupasaun iha sociedade Timor-Leste kona-bá públikasaun filmajen no fotografia balu iha media sosial no portal anonimu balu ne'ebé ninia tendensia halai ba pornografia. Tuir

³² Timor Post. Editorial. Sesta, 27 Setembru 2013

Deputada Josefa Soares katak lei anti pornografia ne'e importante ba Timor-Leste atu hetan tanba bele proteje fetu sira husi hahalok pornografia ne'ebé hatun dignidade umana.³³

Presiza lei anti pornografia hodi regulariza, portantu observasaun FM nian durante ne'e hare katak iha grupu no individu balu ho intensaun públika no espalla pornografia. Fontes ne'ebé FM asesu, iha grupu balu halo operasaun iha fatin públiku wainhira fetu ka mane ida ho nia parseiru tur hamutuk, hasai filmajen no fotografia públika iha media sosial sira.

Kazu Tasi Tolu – Dili autor na'in lima obriga joven ida ho nia parseiru halo relasaun seksual no hasai filmajen ikus espalla no públika iha media sosial sira. Justifika iha pratika ida ne'e autor na'in lima tenki responsabiliza nia aktu iha lei nia oin no ikus kumpri iha prizaun.

Maibe iha kazu barak ema seluk kontinua sai vitima tanba la iha autor ruma maka responsabiliza. Maske filmajen no fotografia ne'ebé vitima hasai ba konsumu privadu maibe ikus monu ba ema seluk nia liman hodi publika no espalla iha media sosial sira. Tanba ne'e nesesariu tebes Timor-Leste presiza iha lei anti pornografia hodi regulariza no difine aktu sira ne'ebé ho intensaun produs, públika ka espalla no fa'an pornografia.

Solusaun: Reazen ka Prevene?

Justifika iha situasaun ne'e polisia kaer ona suspeitu sira. Maibe, solusaun la'os deit atu lori suspeitu ba tribunal. Solusaun atu ita hahu hanoin katak Timor-Leste presiza atu halo estudu ida kle'an, estudu sosial ida ne'ebé bele liga ho kriminolojia atu bele hasai konkluziun ba krime todan no violentu sira be komesa akontese iha Dili, krime sira ne'ebé nia autor ka suspeitu mesak joven deit. Ne'e hatudu ba ita katak buat ruma la'o naksalak iha moris loro-loron joven balu sira nian karik.³⁴

FM nia observasaun insidenti hotu-hotu ne'ebé durante ne'e akontese intervensaun autoridade siguransa sempre ho operasaun no deklarasaun sira husi Komandu Jeral PNTL hasoru situasaun violensia sira iha kapital Dili no distritu liu husi media nasional sira ho deklarasaun ne'ebé makas (nu'udar ezemplu violensia ne'ebé akontese Komandu PNTL sei hasoru ho violensia). Maibe deklarasaun no operasaun sira ne'e la hatudu nia rezultadu diak ba situasaun siguransa. Ironiku liu tan, intervensaun PNTL ba prevensaun konflitu no violensia sempre tarde, número vitima kontinua ás.

Tanba ne'e ita labele reazen deit hasoru situasaun maibe presiza buka solusaun ida preventivu no buka hatene problema lolos joven sira nian saida iha situasaun sosial no ekonomiku nian. FM nia observasaun comunidade sira, joven no estudante universitariu sira diskusaun maka'as iha sira nia familia, bairu no estuda fatin kona-bá dezvoltamentu ida ne'ebé la'o dadauk, mosu lamentasaun oin-oin husi grupu sira ne'e. Grupu comunidade sira kestiona Timor-Leste fakar osan barak ona ba nia dezvoltamentu maibe la hatudu rezultadu ne'ebé signifkante,

³³ The Dili Weekly Online. (2012) GMPTL lakonsege kria Lei Anti Pornografia. Dili <http://www.thediliweekly.com/tl/noticias/jender/772-gmptl-lakonsege-kria-lei-anti-pornografia>. Asesu iha loran 30 Setembru 2013

³⁴ Observasaun Dr. Mari Alkatiri nian ne'ebé públika iha parede facebook kona-bá akontesementu 24 Setembru 2013 ba situasaun sona malu iha kapital Dili.

orsamentu jeral estadu kada tinan aumenta maka'as maibe investimentu lahatudu rezultadu ne'ebé bele kria empregu ba joven sira. Hetok at liu tan kiak ne'ebé aumenta³⁵ no número dezempregu sa'e maka'as.³⁶ Atu dehan katak diskusaun sira ne'e bele los ka sala maibe ida ne'e realidade ida hanesan naha todan, Estadu presiza buka dalan rezolve.

Rezolve ho integradu presiza involve entidade hotu Estadu nian, problema la'os deit konflitu no violensia ne'ebé akontese iha comunidade nune'e reazen ho forsa polisia atu kombate. Maibe presiza buka solusaun ida ne'ebé prevene konflitu no violensia, la'os autoridade siguransa nia responsabilidade deit maibe entidade tomak nia responsabilidade hotu.

Durante ne'e Timor-Leste iha ona instituisaun barak serbisu iha prevensaun konflitu nian maibe esforsu sira ne'e lahatudu pasu avansu ida, violensia kontinua aumenta, grupu krime oranizadu rekruta joven sira involve iha droga no violensia. Kazu 24 Setembru 2013 hanesan lisaun importante ida ne'ebé involve joven sira idade eskola maibe ikus monu ba krime tanba droga. Inklui kazu asaltu no violensia seksual sira iha kapital Dili no grupu joven balu obriga joven seluk halo relasaun seksual depois hasai filmajen.

FM nia hare tentativa sei mosu violensia ne'ebé boot portantu kazu sira ne'ebé liu dadauk grupu krime organizadu rekruta ema ho número ne'ebé boot no involve joven barak iha iha droga, asaltu, violensia seksual to'o oho malu. Ida ne'e presiza solusaun ida lalais no preventivu. Tanba kiak, dezempregu no inflasaun ekonomia ida ne'ebé sa'e maka'as, fasil tebes krime organizadu rekruta joven sira. Portantu sira labele ona atu kompete iha merkadu traballu tanba la iha kriasaun empregu no seluk-seluk tan.

Sumariu Rekomendasaun

FM Nia Rekomendasaun

1. Fundasaun Mahein rekomena ba instituisaun Estadu nian hanesan Ministériu Defeza no Siguransa, SEFOPFE, Ministériu Edukasaun no Sekretariu Estadu Juventude no Desportu halo asaun integradu atu bele hetan rezolusaun diak ba kombate krime organizadu nian.
2. Fundasaun Mahein rekomena ba Komandu PNTL regularmente hala'o patrullamentu iha fatin identifikadu sira ne'ebé sempre mosu konflitu no deskonfia iha rede krime organizadu.
3. Rekomenda ba Komandu PNTL fortifika serbisu polisiamentu komunitaria hodi koopera ho comunidade no autoridade lokal nu'udar meius ida ba prevensaun konflitu nian atu bele detekta rede krime organizadu. Tanba comunidade maka krime nia viziñu, krime nia familia, comunidade maka krime nia maluk no krime nia knuk.

³⁵ Radio Liberdade Online (2013). Kiak iha Timor-Leste sa'e ba 49 %. Dili.

<http://radioliberalidadedili.com/notisia/1103-kiak-iha-tl-sa-e-ba-49> Asesu iha loran 28 Setembru 2013

³⁶ Timor Post Online (2013). Governu La Redus Dezempregu. Dili. <http://www.diariutimorpost.tl/berita-553-governu-la-redus-dezempregu.html> Asesu iha loran 28 Setembru 2013.

4. Rekomenda ba Komandu PNTL kontrola no komunika informasaun siguransa ba comunidade ne'ebé kredível no atual ho nune'e krime organizadu sira lebele kontrola fali informasaun hodi halo comunidade pániku.
5. Governu presiza kapasita intelejensia Estadu iha ambitu kolekta dados ka informasaun no análise dados nian, nune'e bele fornese informasaun ida ne'ebé kredível no atual ba autoridade siguransa no Estadu nian tomak.

Bibliografia

Internet

Fundasaun Mahein (2013). Krime Organizadu: Rekrutamentu Ba Ema Sivil Ho Numeiru Boot. Dili <http://www.fundasaunmahein.org/2013/08/15/organized-crime-increases-civilian-recruitment/>

Mahein Nia Lian Nú. 14, (10 Novembru 2010). Operasaun Krime Organizadu iha Timor-Leste. Dili

Radio Liberdade Online (2013). Kiak iha Timor-Leste sa'e ba 49 %. Dili. <http://radioliberalidadedili.com/notisia/1103-kiak-iha-tl-sa-e-ba-49> Asesu iha lora 28 Setembru 2013

Suara Timor Lorosa'e (STL) – Online (2013). Kazu Marconi, Hamate Joven 1 No Hakanek nain 2. <http://suara-timor-lorosae.com/kazu-marconi-hamate-joven-1-no-hakanek-nain-2/>. Asesu iha lora 30 Setembru 2013

The Dili Weekly Online. (2012) GMPTL lakonsege kria Lei Anti Pornografia. Dili <http://www.thediliweekly.com/tl/notisias/jender/772-gmptl-lakonsege-kria-lei-anti-pornografia>. Asesu iha lora 30 Setembru 2013

Timor Post Online (2013). Governu La Redus Dezempregu. Dili. <http://www.diariutimorpost.tl/berita-553-governu-la-redus-dezempregu.html> Asesu iha lora 28 Setembru 2013.

Intervista

A. C (2013, 26 Setembru). Intervista Pesoa

B. J (2013). Intervista Pesoa. Dili

Grafika rede grupu krime organizadu nu'udar rezultadu husi peskiza Fundasaun Mahein (FM). Dili, 01 Outobru 2013.

Fundasaun Mahein (FM) nia monitorizasaun iha media sosial sira no preokupasaun sira iha komunidad nia leet kona-bá video ne'ebé espalla iha tinan 2011. Dili

Fundasaun Mahein (FM) nia monitorizasaun iha media sosial sira no preokupasaun sira iha komunidad nia leet kona-bá video ne'ebé espalla iha tinan 2012. Dili

Fundasaun Mahein (FM) nia monitorizasaun ba forma sira ne'ebé akontese iha komunidad no iha media sosial hanesan facebook ne'ebé pública husi pesoa balu ho identidade falsu husi tinan 2010 to'o 2013. Dili

M. L (2013). Intervista Pesoal. Dili

Observasaun Dr. Mari Alkatiri nian ne'ebé pública iha parede facebook kona-bá akontesementu
24 Setembru 2013 ba situasaun sona malu iha kapital Dili.

Observasaun Fundasaun Mahein (FM). Sesta, 27 Setembru 2013

P. Z (2013). Intervista Pesoal. Dili

Jornal

Diariu Nasional. Kuarta, 25 Setembru 2013.

Jornal Diario Nasional. Segunda, 30 Setembru 2013.

Suara Timor Lorosa'e – STL. Tersa, 06 Agustu 2013

Timor Post. Kuarta, 04 Setembru 2013

Timor Post. Kinta, 21 Marsu 2011.

Timor Post. Kuarta, 04 Setembru 2013

Timor Post. Tersa, 06 Agustu 2013

Timor Post. Kuarta, 04 Setembru 2013

Timor Post. Kuarta, 25 Setembru 2013

Timor Post. Editorial. Sesta, 27 Setembru 2013

Timor Post. Segunda, 30 Setembru 2013